



清刻龍藏佛說法變相圖

五經同卷

潔五

菩薩睽子經

佛說睽子經

佛說九色鹿經

佛說太子沐魄經

太子慕魄經

潔五

菩薩睽子經

開元錄云失譯人名附西晉

聞如是一時佛在毗羅勒國與千二百五十比丘及眾菩薩國王大臣長者居士清信士女不可稱計一時來會佛告諸比丘皆處定

意聽我前世初得菩薩道時戒行普具精進
一心修集智慧行於善權功德累積不可稱
計諸天龍鬼神帝王人民無能行者阿難聞
佛言更正衣服長跪叉手白佛言願欲所聞
佛告阿難乃往過去無數世時有菩薩名曰
一切妙行慈仁惠施救濟群生常行四等心
度世危難有養苦人時究率天上教授天人
常以晝夜各三時定意思惟三昧照觀十方
天下人民善惡之道知有孝順父母奉事三
尊恭順師長修諸功德者常以天眼徧觀五
道時有迦夷國中有一長者孤無兒子夫婦
兩目皆盲心願入山求無上決修清淨志信
樂空閑菩薩念言此人發意所學微妙而兩
目皆盲目無所覩若入山中或墮溝坑或逢
毒蟲所見枉害若我壽終爲其作子供養父

母終其年壽於是菩薩壽盡即下生爲盲父
母家作子父母歡喜甚愛重之本發大意欲
行入山以生子故便樂留世間子年十歲號
曰睽子至孝仁慈奉行十善不殺不盜不婬
不欺不飲酒不妄言不綺語不嫉妬不咒詛
信道不疑晝夜精進奉事父母如人事天言
常含笑不傷人意行則應法不望傾斜父母
喜悅無復憂愁年過十歲睽自長跪白父母
言本發大意欲入深山志求空寂無上至真
豈以子故而絕本願人居世間無常百變命
非金石對至無期願如本意宜及時入山清
淨我自尋隨與父母供養不失時節父母報
言子之孝順天自知之不違本誓便共入山
睽即以家中所有之物皆施國中諸貧窮者
便與父母俱共入山睽至山中以蒲草爲父

母作屋施作牀褥不寒不熱恒得時宜適入
山中一年衆果豐美食之香甘泉水湧出清
而且涼池中蓮華五色精明梅檀雜香樹木
豐茂香倍於常風雨時節不寒不熱樹葉相
接以障雨露蔭覆日光其下常涼飛鳥翔集
奇妙異類皆作音樂之聲以娛樂盲父母師
子熊羆虎狼毒獸皆自慈心相向無復相害
之意皆食散草果無恐懼之心麋鹿熊羆雜
類之獸皆來附近與睽音聲相和皆作娛樂
之音睽至孝慈心履地常恐地痛天神山神
皆作人形晝夜慰勞_衆三人一心定意無復
憂愁睽常與父母取百種果_三以飼父母恒
有盈餘渴飲泉水無所乏短父母時渴欲飲
睽著鹿皮之衣提瓶行取水麋鹿衆鳥亦復
往飲水不相畏難時有迦夷國王入山射獵

王遙見水邊有麋鹿引弓射鹿箭誤中睽曾
睽被毒箭舉身皆痛便大呼言誰持一毒箭
射殺三道人者王聞人聲即便下馬往到睽
前睽謂王言象坐牙死犀坐其角翠爲毛故
麋鹿爲皮肉故今我無角無牙無毛皮肉不
可欺我今坐何等罪死耶王問睽言卿是何
等人被鹿皮衣與禽獸無異睽言我是王國
中人與盲父母俱來入山中學道二十餘年
未曾爲虎狼毒蟲所見害今便爲王所見射
殺當爾之時山中大風暴起吹折樹木百鳥
悲鳴師子熊羆走獸之輩皆號呼動一山中
日無精光流泉爲竭衆華萎死雷電動地時
盲父母驚起自相謂言睽行取水經久不還
將無爲虎狼毒蟲所害禽獸飛鳥音聲號呼
不如常時風起四面樹木摧折必有災異王

時怖懾大自悔責我所作無狀我本射鹿箭誤相中耳射殺道人其罪甚重坐食少肉重受其殃我今以一國珍寶庫藏之物宮殿妓女丘郭城邑以救子命時王便前以手挽拔睽臂箭箭深不可得出飛鳥走獸四面雲集號呼動一山中王益惶怖三百六十節節皆動睽語王言非王之過自我宿罪所致我不惜身命但憐念我盲父母年既衰老兩目無所見一旦無我亦當終歿無所依仰以是之故用自懊惱酷毒耳當爾之時諸天龍神山神水神樹神皆爲肅動王復重言我寧入泥犁中百劫受罪使睽身活長跪向睽悔過言若子命終我當不復還國便住山中供養卿父母如卿在時勿以爲念諸天龍神皆當證知不負此誓睽聞王此誓言雖被毒箭心

喜意悅雖死不恨以我盲父母累王供養道人現世罪滅得福無量王言卿語我父母處及子未死語我知之睽即指示語從此步徑去是不遠自當見一草屋我父母在其中止王徐徐往勿令我父母怖懾以善權方便解語其意爲我上謝父母無常今至當就後世不惜我命但念父母年老兩目復盲一旦無我無所依仰以此懊惱自酷毒耳死自常分宿罪所致無有得脫者今自懺悔於父母從無數劫已來所行衆惡於此罪滅福生願我與父母世世相值不相遠離願父母終保年壽勿有憂患天龍鬼神常隨護助災害消滅所欲應意無爲自然王便將數人徑詣父母所王去之後睽便奄然而死飛鳥禽獸皆大號呼繞睽屍上以舌舐睽身血盲父母聞此

音聲益怖彷徨而住王行馳駛觸動草木肅肅有人聲父母驚言此是何人非我子行王言我是迦夷國王聞道人在山中學道故來供養道人盲父母言大王來大善勞屈威尊遠臨草野王體中安隱不宮殿夫人太子官屬人民皆安善不風雨和調五穀豐足不隣國不相侵害不王答道人言蒙道人恩皆自平安王問訊盲父母來在山中勞心勤苦樹木之間飛鳥走獸無有侵害道人者不在山中寒暑隨時現世安隱不盲父母言蒙大王厚恩常自安隱我有孝子名睽常爲我取百種果菰泉水恒自豐饒山中風雨和調無所乏短我有草牀可坐果菰可食睽行取水且欲來還王聞盲父母言又大傷心淚出而言我罪惡無狀入山射獵見水邊有群鹿引弓

射之箭誤中道人子睽身被毒箭甚痛故來語二道人父母聞之舉身自撲如太山崩地爲震動王便扶牽父母仰天號哭自訴言我子睽天下至孝仁慈無有過者踐地常恐地痛今有何罪而王射殺之向者大風卒起吹折樹木百鳥悲鳴號呼動一山中我在山中二十餘年未曾有此災異疑我子取水經久不還必當有故諸神皆驚肅肅而動母啼號不可復止父言且止人生無有不死無常自然不可得却且問王言睽爲射何許今爲死活王具以睽口中所言向盲父母說之聞王此言又大感絕我一旦無子俱亦當死願王牽我二人往臨睽屍上王即牽盲父母往到屍上父抱其脚母抱其頭著膝上各以一手摸捫其臂仰天大喚言諸天及龍神山神

樹神水神我子仁慈至孝諸神所知何能不
一哀我子是善子母便以舌舐睖曾瘡願毒
入我口我年已老目無所見以身代子命睖
活我死死不恨也於是盲父母言若睖有至
誠至孝者天地所知箭當拔出毒痛當除睖
更當生於是第二忉利天王釋座即爲大動
以天眼見二道人抱子號哭乃聞第四兜率
天諸天宮龍宮皆儼儼而爲動釋梵四天王
即從第四天上來如人伸臂頃來下住睖前
以神藥灌睖口中藥入睖口箭自拔出便活
如故父母驚喜見睖已死更活兩目皆開飛
鳥禽獸皆作歡樂之音風息雲消日爲重光
泉水涌出衆華五色樹木色榮倍於常時王
大歡喜不能自勝禮天帝釋還禮父母及子
睖願我國財以上道人身自留住供養現世

罪滅宿怨得除睖答王言欲報恩者王且還
國安慰國人皆令奉持五戒王勿復射獵天
傷蟲獸現世身不安隱壽盡當入泥犁中人
居世間恩愛暫有別離久長不得常在王宿
有功德今得爲王莫以得自在故而自放恣
於時國王^{薄五}大自悔責自今已後當^七如睖教勅
不敢有廢諸隨王射獵者數百人見睖已死
神人持藥來下入口即活父母眼開皆踊躍
發意奉持五戒終身不犯王還國中宣令國
中諸有貧窮盲父母如睖比者皆當供養不
得捐捨犯者令有重罪於是國中人民以睖
活故上下相教奉修五戒修行十善死得昇
天無入三惡道者佛告阿難諸來會者宿命
睖身我身是也時盲父者今現父王閱頭檀
是也時盲母者今現我母王夫人摩耶是也

迦夷國王者阿難是也時天帝釋者彌勒是也使我疾成無上正真之道決皆是我父母育養慈恩從死得生感動天龍鬼神父母恩德重孝子所致今得爲佛并度國人皆由孝順之德佛告阿難汝廣爲一切人民說之人有父母不可不孝道不可不學濟神離苦後得無爲皆由慈孝學道所致佛說經已諸菩薩比丘比丘尼優婆塞優婆夷國王大臣人民長者居士莫不加敬稽首佛足作禮而去菩薩睽子經